



REPUBLIKA E SHQIPËRISË  
**KOMISIONERI PËR MBIKËQYRJEN E SHËRBIMIT CIVIL**

Nr. 792/2 Prot

Tiranë, më 26.10.2021

**V E N D I M**

Nr.126, datë 26.10.2021

**Mbi përfundimin e hetimit administrativ me objekt verifikimin e statusit të punësimit, të punonjësit \*\*\*\*\* , aktualisht mbajtës i pozicionit të punës, “*Specialist në Drejtorinë e Taksave dhe Tarifave Vendore*”, në Bashkinë Kamëz, emëruar në këtë detyrë me urdhrin nr. 294 prot., datë 11.9.2017, të Kryetarit të Bashkisë Kamëz.**

Në mbështetje të kompetencave të parashikuara në pikën 1, të nenit 11, nenet 14 dhe 15, të ligjit nr. 152/2013, “*Për nëpunësin civil*”, i ndryshuar, të nenit 95, të ligjit nr. 44/2015, “*Kodi i Procedurave Administrative i Republikës së Shqipërisë*”, si dhe Rregullores “*Mbi procedurat e mbikëqyrjes/inspektimit*”, miratuar me vendimin nr. 17, datë 11.3.2015, të Komisionerit, pas shqyrtimit të materialit të përgatitur dhe propozimit të paraqitur prej Drejtorisë së Përgjithshme të Inspektimit dhe Mbikëqyrjes, në lidhje me vlerësimin e ligjshmërisë të aktit nr. 294, datë 11.9.2017, të Kryetarit të Bashkisë Kamëz, për emërimin e punonjësit \*\*\*\*\* , në pozicionin “*Specialist i Taksave dhe Tarifave Vendore në Terren*”, në Bashkinë Kamëz,

**VËREJ SE:**

Nëpërmjet kërkesës së Kryetarit të Bashkisë Kamëz, protokolluar me nr. 792 prot, datë 13.9.2021, është ngritur pretendimi se ka paqartësi në lidhje me statusin e punësimit të punonjësit \*\*\*\*\* , aktualisht i punësuar në pozicionin e punës, “*Specialist në Drejtorinë e Taksave dhe Tarifave Vendore*”, në Bashkinë Kamëz.

Për efekt të vlerësimit të ligjshmërisë së veprimeve administrative të kryera në këtë rast dhe për të qartësuar pretendimet mbi problematikën e paraqitur, bazuar në nenin 16, kreu III, “*Procedura paraprake*”, të Rregullores “*Mbi procedurat e mbikëqyrjes/inspektimit*”, miratuar me vendimin nr. 17, datë 11.3.2015, të Komisionerit për Mbikëqyrjen e Shërbimit Civil, u krye verifikimi i informacionit të mësipërm, nëpërmjet një takimi të organizuar në ambientet e KMSHC, në datën 15.10.2021, ora 11:00, me përfaqësues të Bashkisë Kamëz, ku u analizua përmbajtja e dosjes personale të punonjësit \*\*\*\*\*.

Pasi u shqyrtua dokumentacioni i dosjes personale të punonjësit në fjalë, u konstatua se \*\*\*\*\* , ka filluar punë në Bashkinë Kamëz, me urdhrin nr. 294 prot., datë 11.9.2017, të Kryetarit të Bashkisë, në pozicionin “*Specialist i Taksave dhe Tarifave Vendore në Terren*”, pranë kësaj bashkie.

Nga përmbajtja e strukturës së Bashkisë Kamëz, e vitit 2017 (*koha ku ka filluar punë punonjësi*) si dhe përmbajtja e strukturës aktuale të kësaj bashkie, rezultoi se pozicioni i punës “*Specialist në Drejtorinë e Taksave dhe Tarifave Vendore*”, pranë Bashkisë Kamëz, ka qenë dhe është pjesë e shërbimit civil dhe si i tillë ky pozicion duhej të plotësohej vetëm nëpërmjet kryerjes së procedurës së konkurrimit, parashikuar nga nenet 21 deri 24, të ligjit nr. 152/2013, “*Për nëpunësin civil*”, i ndryshuar.

Në këto kushte, duke qenë se marrëdhënia aktuale e punësimit të nëpunësit \*\*\*\*\* , nuk është lidhur në respektim të kërkesave të legjislacionit të shërbimit civil, arrihet në përfundimin se ai nuk e ka fituar statusin e nëpunësit civil.

Po kështu, ai nuk mund të përfitojë statusin e nëpunësit civil, nga mundësia që ka dhënë dispozita e nenit 67, të ligjit nr. 152/2013, “*Për nëpunësin civil*”, i ndryshuar, pasi marrëdhënia e tij e punësimit është lidhur pas datës 26.2.2014, (*që ka qenë dita e fillimit të efekteve të ligjit në fjalë*), e si e tillë nuk mund të trajtohet si marrëdhënie punësimi ekzistuese, në momentin e fillimit të veprimit të këtij ligji.

Përfundimisht, bazuar në përcaktimin e pikës 4, të nenit 23, të ligjit nr. 152/2013, “*Për nëpunësin civil*”, i ndryshuar, sipas së cilës çdo emërim në pozicion ekzekutiv, në kundërshtim me këtë nen, është “*absolutisht i pavlefshëm*”, marrëdhënia e punësimit të punonjësit \*\*\*\*\* , nuk është marrëdhënie në shërbimin civil dhe njësisë përgjegjëse të Bashkisë Kamëz, i lind e drejta dhe detyrimi, të urdhërojë menjëherë, ndërprerjen e kësaj marrëdhënie punësimi dhe të marrë masat për plotësimin e pozicionit nëpërmjet procedurës së konkurrimit, sipas rregullave të legjislacionit të shërbimit civil.

#### **Për këto arsye:**

Në mbështetje të kompetencës së përcaktuar në nenin 11, pika 1, nenet 14 dhe 15, të ligjit nr. 152/2013, “*Për nëpunësin civil*”, i ndryshuar, në nenin 95, të ligjit nr. 44/2015, “*Kodi i Procedurave Administrative i Republikës së Shqipërisë*”, i cili parashikon, përfundimin e procedurës administrative, kur objekti për të cilin ka nisur procedura është realizuar, si dhe në mbështetje të nenit 16, pika 6, të Rregullores, “*Mbi procedurat e mbikëqyrjes/inspektimit*”, miratuar me vendimin nr. 17, datë 11.3.2015, të Komisionerit për Mbikëqyrjen e Shërbimit Civil,

## **VENDOSA:**

1. Për rregullimin e gjendjes së ligjshmërisë, Njësia Përgjegjëse e Bashkisë Kamëz, të marrë masa të menjëhershme për ndërprerjen e marrëdhënies së punës për punonjësin \*\*\*\*\*, si dhe të shpallë pozicionin të lirë, për plotësimin e tij sipas rregullave të legjislacionit të shërbimit civil.
2. Për kryerjen e këtij veprimi administrativ, lihet afat 15 ditë, nga marrja dijani e vendimit.
3. Me kalimin e këtij afati, njësia përgjegjëse është e detyruar të njoftojë me shkrim Komisionerin për Mbikëqyrjen e Shërbimit Civil, në lidhje me zbatimin e këtij vendimi.
4. Në rast të mos respektimit të vendimit, përgjegjësia do të jetë personale e subjekteve, që nuk kanë kryer detyrimin dhe në zbatim të përcaktimit të pikës 2, të nenit 15, të ligjit nr. 152/2013, “Për nëpunësin civil”, i ndryshuar, Komisioneri do të vijojë procesin për rregullimin e shkeljeve të konstatuara, duke përdorur mjetet ligjore për të rikthyer ligjshmërinë në administrimin e shërbimit civil, nëpërmjet gjobitjes së nëpunësit përgjegjës, për moszbatimin e masës së përcaktuar në dispozitivin e vendimit.
5. Të njoftohet për këtë vendim, Kryetari i Bashkisë Kamëz, Njësia Përgjegjëse e Bashkisë Kamëz dhe punonjësi \*\*\*\*\*.

Ky vendim hyn në fuqi menjëherë.

**KOMISIONERI**

**Pranvera Strakosha**